

Treća skupština i savjetovanje o političkoj nauci Jugoslavenskog udruženja za političke nauke

Politička nauka sadržajno provocira. Sve je u njoj pod pitanjem: pretpostavke, određenje, kriteriji, osnovne kategorije. Čini se, što se više politika sprovodi, to smo dalje od toga da je smisleno odredimo.

Interes za političku nauku, za njenu teorijsku zasnovanost i valorizaciju, sve je veći kod nas. I obzirom na njen unutarnji princip i obzirom na njen društveni značaj. Sasvim razumljivo u kontekstu socijalnih mijena našeg društva i našeg vremena i njihovih svih, mnogodimenzionalnih, učinaka.

No jedna je bitna odrednica ovog sve šireg interesa za političku nauku: ona je tekovina demokratske svijesti, koja misterij države rastvara na nezamućene odnose, u kojima ličnost, a ne masa, postaje mjerilo za motiviranost i osmišljenost javne vlasti.

Unisonost u metodološkom smislu (a mnogi i to dovode u pitanje svojim pozitivističkim pristupom) ne znači, očito, uniformnost koncepcija. Za sada, moglo bi se reći, takva mehanika mišljenja bila bi štetna. Složenost odnosa, pojavnne novine, raznovrsnost ideja i ideoloških orijentacija savremenih društava zahtijevaju kompleksniji i, prije svega, samostalniji studij. To će reći, intelektualnu čestitost nasuprot konformističkoj lagodnosti i deklariranom optimizmu.

Gledano u početnim naporima da se tako složeni i tako odsudni politički fenomen današnjice naučno-teoretski zahvati, može se reći da više imamo lansiranih ideja nego izvedenih koncepcija; više kulturne reprodukcije materijala nego stvaralačkog intenziteta. Očito je da za jedan tako ozbiljan zadatak treba više energije, pripreme i metodičnosti; kratko — vremena. Meteorski bljesak, ma kako imaginativan, nije svjetlo istine.

U toj objektivnoj ocjeni problema konstituiranja političkih nauka treba, svakako, istaći kao tekovine dosadašnjih napora: nesumnjivu politološku orijentaciju, naučni interes i otvorenost za probleme (koji su, istina, manje aktuelni nego što bi se to, po prirodi stvari, moglo očekivati).

Godišnja skupština Udruženja za političke nauke, prema referatima i, naročito, diskusijama, potvrđuje naše nade ali i našu rutinu. I to je razlog da redakcija »Političke misli« smatra neceleshodnim da u ekstenziji objavi cjelokupni materijal, kako je to prvotno zamišljala, sugerirajući istovremeno da autori studijski obrade tretirana pitanja u cilju dubljeg zahvata onog što je naša aktuelna naučna i društvena potreba i osnova našeg društvenog i naučnog progressa.